



STATUT

Streljačkog saveza Federacije Bosne i Hercegovine

Zavidovići, 03.03.2024. godine

STRELJAČKI SAVEZ FEDERACIJE BOSNE I HERCEGOVINE
Travnik bb, 72270 Travnik, Bosna i Hercegovina; e-mail: ssfederacijebih@gmail.com
Transakcijski račun: 134-010-0000374928 ASA BANK; ID: 4218836030001



STATUT

STRELJAČKOG SAVEZA FEDERACIJE BOSNE I HERCEGOVINE

Na osnovu člana 18. Zakona o udruženjima i fondacijama Federacije Bosne i Hercegovine („Službene novine Federacije Bosne i Hercegovine“, br. 12/2002) te člana 22. Zakona o sportu Bosne i Hercegovine („Sl. glasnik BiH“, br. 27/2008; 102/2009 i 66/2016), Skupština Streljačkog saveza Federacije Bosne i Hercegovine, na sjednici održanoj 24.04.2022. godine u Visokom donijela je

STATUT

STRELJAČKOG SAVEZA FEDERACIJE BOSNE I HERCEGOVINE

OSNOVNE ODREDBE

Član 1.

Ovim statutom, u skladu sa Zakonom, uređuje se:

1. Naziv i sjedište Saveza;
2. Ciljevi i djelatnosti Saveza;
3. Zastupanje i predstavljanje Saveza;
4. Tijela Saveza, njihove ovlasti, način imenovanja i opoziva, trajanje mandata, kvorum i pravila glasanja, uključujući i pitanja o kojima se odlučuje kvalificiranom većinom, funkciju osobe ovlaštene da saziva Skupštinu;
5. Oblik i sadržaj pečata Saveza;
6. Oblik i sadržaj znaka;
7. Stjecanje i raspolaganje imovinom;
8. Način donošenja finansijskog izvještaja i izvještaja o radu;
9. Postupak za donošenje statuta, izmjena i dopuna statuta i drugih općih akata Saveza;
10. Uvjeti i način učlanjenja, prestanak članstva, kao i prava, dužnosti i odgovornosti članova Saveza;
11. Uvjeti i postupak za pripajanje, razdvajanje, transformaciju ili prestanak rada Saveza;
12. Pravila za raspodjelu preostale imovine u slučaju prestanka rada Saveza;
13. Javnost rada;
14. Prelazne i završne odredbe.

NAZIV I SJEDIŠTE SAVEZA

Član 2.

Naziv saveza je: „STRELJAČKI SAVEZ FEDERACIJE BOSNE I HERCEGOVINE“

Skraćeni naziv saveza je: „SSFBiH“

Član 3.

Sjedište Saveza je na adresi: Pirota bb, 72270 Travnik, Bosna i Hercegovina.
Savez može promijeniti naziv i sjedište, o čemu Skupština donosi posebnu odluku.

CILJEVI I DJELATNOST SAVEZA

Član 4.

Ciljevi Streljačkog saveza Federacije Bosne i Hercegovine su:

- unapređivanje, razvoj i promocija streljačkog sporta među građanima, posebno djecom i omladinom,
- predstavljanje streljačkog sporta Federacije Bosne i Hercegovine u Federaciji Bosne i Hercegovine, Bosni i Hercegovini, inostranstvu, kao i pred sportskim, državnim, upravnim i drugim tijelima u Federaciji Bosne i Hercegovine,
- razvoj olimpijskih i neolimpijskih streljačkih disciplina,
- organizacija takmičenja u streljačkim disciplinama, kako u nacionalnim, tako i međunarodnim programima;
- obuka stručnog kadra i
- ostvarivanje uvjeta za tehnički pregled oružja.

Savez u skladu sa ciljevima djeluje na području sporta.

ZASTUPANJE I PREDSTAVLJANJE SAVEZA

Član 5.

Streljački savez Federacije Bosne i Hercegovine (u daljem tekstu Savez), zastupa i predstavlja Predsjednik Upravnog odbora.

Predsjednik Upravnog odbora nema pravo raspolaganja imovinom Saveza preko iznosa od četiri stotine (400,00) KM.

TIJELA SAVEZA, NJIHOVE OVLAŠTI, NAČIN IMENOVANJA I OPOZIVA, TRAJANJE MANDATA, KVORUM I PRAVILA GLASANJA, UKLJUČUJUĆI I PITANJA O KOJIMA SE ODLUČUJE KVALIFICIRANOM VEĆINOM, FUNKCIJU OSOBE OVLAŠTENE DA SAZIVA SKUPŠTINU

Član 6.

Tijela Saveza su:

1. Skupština
2. Upravni odbor
3. Nadzorni odbor
4. Disciplinski sud

Skupština

Član 7.

Skupština Saveza je najviše tijelo upravljanja, koju čine svi redovni članovi Saveza.

Član 8.

Skupština Saveza nadležna je i obavlja sljedeće poslove:

- a. Donosi statut, izmjene i dopune statuta i druge akte određene statutom;
- b. Daje suglasnost na pravne radnje poduzete u postupku utemeljivanja Saveza;
- c. Imenuje i opoziva osobu ovlaštenu za zastupanje i predstavljanje Saveza;
- d. Usvaja izvještaj koji je pripremilo lice ovlašteno za zastupanje i predstavljanje;
- e. Odlučuje o udruživanju u saveze, pripajanju, razdvajanju, transformaciji, prestanku rada i drugim statusnim promjenama Saveza;
- f. Odlučuje o svim pitanjima koja nisu u nadležnosti drugog organa.
- g. Imenuje i razrješava delegate u Skupštini saveza Bosne i Hercegovine.

Član 9.

Skupština radi u sjednicama.

Skupštine mogu biti izborne, redovne i vanredne.

Sjednice Skupštine sazivaju se redovno, najmanje jednom godišnje.

Vanredna sjednica Skupštine može se zakazati na obrazloženi prijedlog predsjednika Upravnog odbora, kao i na pismenu inicijativu jedne trećine članstva Skupštine.

Na vanrednoj Skupštini raspravlja se o temi koja je povod njenog sazivanja.

Član 10.

Skupštinu saziva predsjednik Skupštine najmanje 15 (petnaest) dana prije njenog zasjedanja. Predsjednik je dužan sazvati Skupštinu i u slučaju kada to zahtijeva najmanje jedna trećina članova Skupštine, ili kada to zatraži predsjednik Upravnog odbora, u roku od 30 (trideset) dana.

Član 11.

Skupština ima kvorum za rad ako sjednici Skupštine prisustvuje više od polovine ukupnog broja članova.

Skupština odlučuje natpolovičnom brojem glasova prisutnih članova.

Član Saveza o kojem se Skupština izjašnjava glasanjem, nema pravo izjašnjavanja.

Za odluku o izmjenama i dopunama Statuta neophodna je dvotrećinska većina glasova prisutnih članova, osim odluka definiranih članom 47, 48, 49 i 50.

Član 12.

Bliže odredbe o načinu rada Skupštine, glasanju, odlučivanju, upućivanju poziva za sjednice i drugim pitanjima od značaja za rad Skupštine definišu se Poslovníkom o radu Skupštine Saveza.

Član 13.

Skupština bira predsjednika i potpredsjednika Skupštine.

Predsjednik i potpredsjednik Skupštine za svoj rad odgovaraju Skupštini.

Predsjednik Skupštine se bira na period od četiri godine, uz mogućnost reizbora na još jedan mandat.

Predsjednik Skupštine obavlja sljedeće zadatke:

- Saziva sjednice Skupštine i predsjedava sjednicama;
- Potpisuje akte, odluke i druge pisane dokumente iz nadležnosti Skupštine Saveza;
- Obavlja i druge poslove u skladu s ovim statutom;
- U slučaju spriječenosti, predsjednika Skupštine može da zamijeni redom: njegov potpredsjednik ili član Skupštine kojeg on odredi. Predsjednik mora dati pismeno obrazloženje i ovlasti na koga prenosi svoju funkciju.

Predsjedniku Skupštine može prestati mandat i prije isteka redovnog roka:

- Ostavkom na poziciji;
- Opozivom;
- Inicijativu za opoziv predsjednika Skupštine može dati jedna trećina članova Skupštine;
- U slučaju opoziva, Skupština Udruženja na istoj sjednici bira drugu osobu na to mjesto.

Član 14.

Upravni odbor je izvršno tijelo Saveza i broji pet (5) članova.

Članove Upravnog odbora bira i imenuje Skupština Saveza.

Nadležnosti Upravnog odbora su sljedeće:

1. Priprema sjednice Skupštine;
2. Priprema i predlaže nacrt izmjena Statuta i drugih akata koje donosi Skupština;
3. Provodi politiku, zaključke i druge odluke koje je donijela Skupština;
4. Upravlja imovinom Saveza;
5. Podnosi godišnje ili periodične izvještaje o svom radu Skupštini na usvajanje;
6. Vršiti druge poslove određene Statutom;
7. Bira generalnog sekretara Saveza;
8. Održava sjednice Upravnog odbora jednom mjesečno, a najmanje četiri puta godišnje, uz mogućnost da se sjednice mogu održavati i elektronski, s time da odluke potvrđuju na prvoj narednoj sjednici Upravnog odbora;
9. Izrada općih i pojedinačnih akata u skladu sa članom 32.

Član 15.

Nadzorni odbor ima predsjednika i dva člana, od kojih jedan mora biti ekonomske ili pravne struke.

Skupština imenuje predsjednika i članove Nadzornog odbora.

Članovi Nadzornog odbora ne mogu biti članovi Skupštine.

Mandat članova Nadzornog odbora traje četiri godine sa mogućnošću reizbora.

Član 16.

Odluke se donose većinom glasova od ukupnog broja članova.

Član 17.

Zadatak Nadzornog odbora je da vrši kontrolu rada te da podnese izvještaj Skupštini.

Član 18.

Savez ima Disciplinski sud koji ima predsjednika i dva člana.

Članove Disciplinskog suda bira i razrješava Skupština, i njihov mandat traje četiri godine sa mogućnošću reizbora na još jedan mandat.

Disciplinski sud odlučuje o sljedećim pitanjima:

- a. Kršenju akata, pravila i normi ponašanja Saveza;
- b. Disciplinskim prekršajima;
- c. Arbitražnim sporovima.

Postupak i način rada Disciplinskog suda utvrđuje se Pravilnikom o radu Disciplinskog suda i drugim općim aktima Saveza koje donosi Skupština Saveza.

Disciplinski sud zasjeda u punom sastavu i odluke donosi jednoglasno.

OBLIK I SADRŽAJ PEČATA**Član 19.**

Savez ima svoj pečat i štambilj.

Pečat je okruglog oblika prečnika 35 mm (tridesetipet milimetara). U centru pečata je stilizovana meta sa koncentričnim krugovima. U gornje desno polje mete je smješten grb Bosne i Hercegovine. Po rubu pečata, počev od donjeg dijela u smjeru kazaljke na satu je velikim slovima ispisano: „STRELJAČKI SAVEZ FEDERACIJE BOSNE I HERCEGOVINE“. Tekst je ispisan latiničnim pismom. Pečat je oivičen sa dvije koncentrične kružnice, unutrašnja je tanja a vanjska je deblja. Pečat ima dva primjerka obilježena brojevima „1“ i „2“ smještenim u donjem dijelu pečata između početka i kraja natpisa „STRELJAČKI SAVEZ FEDERACIJE BOSNE I HERCEGOVINE“. Pečat sa oznakom „1“ duži predsjednik Upravnog odbora, a pečat sa oznakom „2“ duži Generalni sekretar saveza.

Štambilj je četvrtastog oblika dužine 35 mm (tridesetipet milimetara) sa natpisom „STRELJAČKI SAVEZ FEDERACIJE BOSNE I HERCEGOVINE“ i prostorom za broj i datum.

Štambilj služi za ovjeru primitka pošte i pismenih podnesaka.

OBLIK I SADRŽAJ ZNAKA

Član 20.

Savez ima svoj znak koji je stilizovani izgled mete na štitu i sa nazivom Streljačkog saveza Federacije Bosne i Hercegovine.

STICANJE I RASPOLAGANJE IMOVINOM

Član 21.

Imovinu Saveza čine: prava, stvari i novac, koje Savez stječe u skladu sa zakonima u Bosni i Hercegovini i ovim statutom.

Za obveze prema trećim licima, Savez odgovara cjelokupnom imovinom.

Član 22.

Imovinu Saveza čine:

- a. Članarina;
- b. Doborovoljni prihodi i pokloni fizičkih i pravnih lica;
- c. Sredstva dodijeljenja iz budžeta;
- d. Prihodi od kamate, dividendi, dobiti od kapitala, zakupnina, honorara i sličnih izvora pasivnih prihoda;
- e. Prihodi stečeni obavljanjem privredne djelatnosti;
- f. Drugi prihodi stečeni u skladu sa zakonom i Statutom;
- g. Pokretna i nepokretna imovina.

Član 23.

Savez ne može primati finansijska ili materijalna sredstva, kao ni prihvatati, bez naknade, uslugu ni od jedne političke organizacije u zemlji ili svijetu.

Sva sredstva evidentirana na računu Saveza, a porijeklom od političkih organizacija, bit će odmah vraćena pošiljatelju, a o tome odmah obaviještena Skupština Saveza.

Član 24.

Savez može obavljati privrednu djelatnost u skladu sa Zakonom, a radi ostvarivanja ciljeva utvrđenih u članu 4. ovog Statuta.

Za obavljanje neposredne privredne djelatnosti, odnosno djelatnosti koja nije vezana s ciljevima Saveza, može se formirati posebna pravno lice u skladu s važećim zakonskim propisima u Bosni i Hercegovini.

Član 25.

O stjecanju prihoda, korištenju imovine i raspolaganju sredstvima Saveza, odlučuje Upravni odbor u skladu s ovim statutom i općim aktima Saveza.

Član 26.

Savez je dužan uredno voditi poslovne knjige u skladu s prihvaćenim računovodstvenim principima i sastavljati financijske izvještaje, suglasno važećim propisima.

Član 27.

Upravni odbor, najmanje jedanput godišnje, podnosi Skupštini izvještaj s podacima o finansijsko-materijalnom stanju Saveza, korištenju imovine, prihodima i rashodima Saveza i drugim pitanjima od značaja za raspolaganje imovinom i za finansijsko poslovanje Saveza, a na zahtjev Skupštine, dužan je podnijeti izvještaj i prije isteka jednogodišnjeg perioda.

Član 28.

Predsjednik Upravnog odbora je ovlašten da potpisuje akte koji se odnose na stjecanje i raspolaganje imovinom Saveza i na finansijsko poslovanje, u skladu sa članom 26. ovog Statuta.

Član 29.

Svaki član Saveza ima pravo da ostvari uvid u poslovne knjige i drugu dokumentaciju u vezi s imovinom i finansijskim poslovanjem Saveza.

Ostvarivanje prava iz prethodnog stava dužan je osigurati predsjednik Upravnog odbora, a najkasnije osam dana od dana prijema pisanog zahtjeva člana Saveza.

NAČIN DONOŠENJA FINANSIJSKOG IZVJEŠTAJA I IZVJEŠTAJA O RADU

Član 30.

Upravni odbor priprema nacrt godišnjeg finansijskog izvještaja i podnosi ga Skupštini na usvajanje.

Član 31.

Upravni odbor dužan je najmanje jednom godišnje podnijeti izvještaj o svom radu Skupštini.

POSTUPAK ZA DONOŠENJE STATUTA, IZMJENA I DOPUNA STATUTA I DRUGIH OPĆIH AKATA UDRUŽENJA

Član 32.

Osnovni akt Saveza je Statut.

Opći akti Saveza su:

- a. Pravilnici;
- b. Odluke;
- c. Poslovnici.

Opći akti moraju biti suglasni Zakonu o udruženjima i fondacijama FBiH i drugim važećim zakonima u FBiH, kao i Statutu Saveza.

Pojedinačni akti su:

- a. Odluke;
- b. Rješenja;
- c. Zaključci;
- d. Upute;
- e. Mišljenja i
- f. Potvrde.

Član 33.

Opći akti Saveza donose se u slučajevima kada je to izričito utvrđeno Zakonom, Statutom kao i u drugim slučajevima kada se na opći način uređuju pitanja od značaja za ostvarivanje ciljeva Saveza.

Član 34.

Inicijativu za izmjene i dopune Statuta može podnijeti svaki član Saveza.

Inicijativa se podnosi Upravnom odboru, u pisanom obliku, i uz odgovarajuće obrazloženje.

Prijedlog za izmjene i dopune Statuta utvrđuje Upravni odbor, te tako utvrđeni prijedlog dostavlja Skupštini, u pisanom obliku i uz odgovarajuće obrazloženje.

Član 35.

O izmjenama i dopunama Statuta odlučuje Skupština, glasanjem najmanje dvotrećinskom većinom glasova ukupnog broja članova Saveza.

Član 36.

Predsjednik Skupštine potpisuje Odluke o izmjenama i dopunama Statuta, koje se smatraju originalima i čuvaju se u arhivi Saveza i dostavljaju nadležnom Ministarstvu.

UVJETI I NAČIN UČLANJENJA, PRESTANAK ČLANSTVA, KAO I PRAVA, DUŽNOSTI I ODGOVORNOSTI ČLANOVA SAVEZA

Član 37.

Članovi Saveza mogu biti:

- a. Redovni;
- b. Pomažući;
- c. Počasni.

Redovni članovi Saveza su streljački klubovi, sukladno Zakonu o sportu Bosne i Hercegovine.

Pomažući članovi Saveza su pojedinci koji nisu članovi streljačkog kluba.

Pomažući članovi Saveza učestvuju u radu Saveza i Skupštine, ali nemaju pravo glasa.

Počasni članovi Saveza su članovi kojima su dodijeljena priznanja po pravilniku o dodjeli priznanja.

Skupština Saveza, donosi Pravilnik o Registru članova Saveza odmah nakon registracije Saveza kod nadležnog Ministarstva.

Član 38.

Članstvo u Savezu je dobrovoljno.

Klubovi i kantonalni streljački savezi stječu pravo pristupanja u Savez popunjavanjem obrasca zahtjeva, definiranog Pravilnikom o prijemu, članstvu i isključenju članova Saveza, čiji sastavni dio je i izjava o prihvatanju ciljeva i Statuta Saveza.

Član 39.

Odluku o prijemu novog člana Saveza donosi Upravni odbor, shodno Pravilniku o prijemu, članstvu i isključenju članova Saveza, a na osnovu zahtjeva za pristupanje u članstvo.

Protiv odluke Upravnog odbora o prijemu novog člana može se podnijeti prigovor.

Prigovor se podnosi pismenim putem Skupštini u roku od 8 (osam) dana od dana uručjenja odluke.

Blagovremeno podneseni prigovor odlaže prijem novog člana u Savez.

Na osnovi blagovremeno podnesenog prigovora, Skupština Saveza dužna je odgovoriti u roku do petnaest (15) dana od dana podnošenja prigovora.

Član Saveza koji je ranije isključen iz Saveza gubi pravo ponovnog uključenja u Savez.

Član 40.

Članovi Saveza imaju pravo da:

- a. Budu redovno informirani o radu svih tijela Saveza;
- b. Aktivno učestvuju u radu i odlučivanju u svim organima i radnim tijelima Saveza;
- c. Biraju i budu birani u organe Saveza;
- d. Aktivno učestvuju u utvrđivanju programa i plana rada Saveza i njihovoj realizaciji;
- e. Ostvaruju uvid u rad Saveza, pokreću akcije, predlažu i poduzimaju mjere za ostvarivanje ciljeva i djelatnosti i programa rada Saveza;
- f. Ostvaruju zaštitu svojih prava.

Članovi Saveza su obavezni da:

- a. Čuvaju ugled Saveza;
- b. Poštuju odredbe Statuta, ciljeve i djelatnost i druga opća akta Saveza;
- c. Aktivno učestvuju u obezbjeđenju realizacije usvojenih programa i planova Saveza i drugih obaveze od interesa za streljački sport;
- d. Učestvuju u stručnim aktivnostima Saveza;
- e. Izvršavaju obaveze koje proističu iz kalendara takmičenja;
- f. Plaćaju članarinu;
- g. Učestvuje u radu Skupštine;
- h. Biraju i budu birani u organe Saveza.

Član 41.

Članstvo u Savezu prestaje:

- a. Dobrovoljnim istupanjem iz Saveza;
- b. Neplaćanjem članarine u roku određenom aktima Saveza;
- c. Povredom odredbi Statuta i drugih općih akata Saveza;
- d. Prestankom pravnog subjektiviteta člana.

Odluku o prestanku članstva zbog povreda Statuta donosi Upravni odbor.

Prestankom članstva prestaju i sva članska prava i obaveze u Savezu.

Član 42.

Svaki član Saveza može dobrovoljno istupiti iz Saveza na osnovi pisane izjave o istupanju koju dostavlja Upravnom odboru, koji donosi odluku o brisanju iz Registra članova. Kao dan prestanka članstva smatrat će se datum prijema izjave o istupanju.

Član 43.

Član koji krši Statut Saveza, ne izvršava svoje obveze prema Savezu, ili svojim postupcima na drugi način šteti ili narušava ugled Saveza, može biti isključen iz Saveza.

Prije donošenja odluke o isključenju, član Saveza mora biti obaviješten u pisanoj formi prijedlogom za isključenje, kao i razlozima zbog kojih se isključenje predlaže.

Članu Saveza se mora ostaviti rok od 8 (osam) dana od dana prijema prijedloga za isključenje, u kojem se može izjasniti o pokrenutom prijedlogu.

Ukoliko se član ne izjasni u pisanom obliku, javno ili osobno pred Upravnim odborom, smatrat će se da je saglasan s odlukom.

Ukoliko je članu Saveza, iz bilo kojeg razloga, nemoguće uručiti prijedlog za isključenje, nakon proteka roka od 8 (osam) dana od dana donošenja prijedloga, isti će se smatrati isključenim, a o razlozima isključenja će biti obaviještena Skupština Saveza.

Odluku o isključenju donosi Upravni odbor.

Protiv odluke Upravnog odbora kojom se član isključuje iz Saveza, u roku od 8 (osam) dana od dana donošenja odluke, može se izjaviti prigovor Skupštini Saveza.

Prigovor može izjaviti isključeni član, kao i drugi članovi Saveza, ukoliko ostvare legitimitet više od polovine ukupnog broja prisutnih članova Saveza.

Odluka Skupštine Saveza je konačna, i protiv nje nije dozvoljena žalba.

Član 44.

Savez vodi evidenciju koja, pored ostalog sadrži matičnu knjigu u kojoj se unose podaci o:

- a. Registru članova Saveza;
- b. Aktivnim članovima u pojedinim disciplinama;
- c. Stručnim kadrovima;
- d. Donatorima i sponzorima;
- e. Profesionalno zaposlenim licima u Savezu;
- f. Članovima u organima Saveza;
- g. Ostvarenim rezultatima na takmičenjima;
- h. Ostali podaci.

Član 45.

Član Saveza koji istupi ili je isključen iz Saveza dužan je izvršiti sve finansijske i materijalne obaveze prema Savezu, dospjele do dana prestanka članstva.

Član 46.

Osnivači Saveza, donatori i ostali članovi Saveza mogu, u slučaju izuzetnih zasluga i doprinosa u afirmaciji Saveza, dobiti i priznanje Saveza.

Odluku o dodjeli priznanja donosi i potpisuje predsjednik Skupštine.

UVJETI I POSTUPAK ZA PRIPAJANJE, RAZDVAJANJE, TRANSFORMACIJU ILI PRESTANAK RADA SAVEZA

Član 47.

Savez se može pripojiti drugom savezu.

Savezu se može pripojiti drugi savez.

Član 48.

Odluku o pripajanju ili transformaciji donosi Skupština Saveza na prijedlog predsjednika Upravnog odbora.

Član 49.

Odluka iz prethodnog člana Statuta smatra se usvojenom kada je na sjednici Skupštine prihvati više od dvije trećine članova.

Član 50.

Savez može prestati s radom dobrovoljno ili po sili zakona.

Savez prestaje s radom dobrovoljno, a na prijedlog predsjednika Skupštine, podržanog od najmanje dvije trećine članova Saveza, ako o tome, odluče osnivači Saveza.

Ako, u vrijeme odlučivanja o dobrovoljnom prestanku rada Saveza, u aktivnom članstvu više nema osnivača iz Odluke o osnivanju, ili ih ima najviše dva, tada odluku o prestanku rada Saveza donosi glasanjem najmanje tročetvrtinski broj članova Saveza.

Ova odluka ne podliježe pravu žalbe.

PRAVILA ZA RASPODJELU PREOSTALE IMOVINE U SLUČAJU PRESTANKA RADA SAVEZA

Član 51.

Istodobno s odlukom o dobrovoljnom prestanku rada Saveza, Skupština donosi plan likvidacije Saveza, kojim se utvrđuje raspored imovine, prava i obveze Saveza.

Skupština imenuje likvidatora Saveza, čija je dužnost da se stara o izvršenju plana likvidacije, i koji je ovlašten da zastupa Savez u postupku likvidacije, kao i u podnošenju zahtjeva za prijavu prestanka rada Saveza nadležnim organima.

Član 52.

U postupku likvidacije Saveza, iz imovine Saveza izmirit će se sve zakonske obaveze, kao i obaveze nastale prema drugim vjerovnicima Saveza, a eventualna preostala imovina rasporediti će se na članove Saveza srazmjerno njihovom udjelu u njenoj nabavi.

JAVNOST RADA

Član 53.

Rad Saveza je javan.

Javnost rada Saveza ostvaruje se na način utvrđen zakonom i ovim statutom.

Član 54.

Organi Saveza su dužni da ovlaštenim predstavnicima sredstava informiranja učine dostupnim podatke, informacije i isprave koje se odnose na rad Saveza.

Predstavnici sredstava informiranja imaju pravo da prisustvuju sjednicama tijela Saveza i da izvještavaju o radu tih tijela.

Član 55.

Izuzetno, općim aktom, koji donosi Upravni odbor može se utvrditi da pojedine informacije, podaci i isprave predstavljaju poslovnu tajnu i kada se razmatraju bez prisustva javnosti.

Istim aktom mogu se utvrditi odgovorne osobe za korištenje i zaštitu informacija koje imaju karakter poslovne tajne.

Za poslovnu tajnu ne mogu se odrediti podaci koji su javni po zakonu i drugim propisima, kao i podaci o kršenju zakona i drugih propisa.

PRELAZNE I ZAVRŠNE ODREDBE

Član 56.

Izrazi napisani samo u muškom rodu odnose se podjednako na muški i ženski rod.

Član 57.

Skupština Saveza je nadležna za tumačenje odredbi ovog Statuta.

Član 58.

Ovaj statut stupa na snagu danom usvajanja.

Član 59.

Stupanjem na snagu ovog Statuta prestaje da važi Statut koji je donesen 06.01.2011. godine.

Dana: 28.01.2023. godine
Mjesto: Zenica

Predsjednik Skupštine
Akif Tupo